

## DECLARACION UNIVERSAL DE LOS DERECHOS HUMANOS T'SIMANE

### **ARTICULO 1**

Räj mun'tyi' naeja' vaj cäts vajo'meja'dye, tupuj dyi'jyeja junchuc ra' chijoj coja' jemoñe' jäm jitica'cui tsun judyeya' yocstyitum in.

### **ARTICULO 2**

Räj muntyi' in moya' mo'tupujdye mu'in peyaqui in,paj tsan ju'ñijaty cui' tsun.

Yocsi' peyacdye' peye'tyi', jen'nacdye' mu', tupuj yu'taqui' dyijyedye'.

Jam' jun' tupuj yoc yu'tica' tsun cui'si'che' bäyedye'tsun, paj tsan yocsi've bäyedye tsun.

### **ARTICULO 3**

Räj muntyi' parej bäyity in mo'ya tupujdye' mu'in tsasi'.dyes mu'in judyeya' paj qui' faraj momo'in, jäm bä'yí cui' in.

### **ARTICULO 4**

Jam' tyi' tupuj uñitybu'yi yu'sin, mi jam tupuj ji'mincatica'.

### **ARTICULO 5**

Jam'jun' tupuj'yirity mun'tyi' ferche' va'tacdye' someja,cattac, yita'rac, pa'cac sonya', cacaij na jam tsun jebacdye'.

### **ARTICULO 6**

Räj muntyi' tsun jam jun tupuj' yoc yu'taca' tij tsun judyeya' jiyis tsun me' yocve jijcaja jui'ya'.

### **ARTICULO 7**

Mo' yu'tacdye' räjdyes mun'tyi', jemoñe' ji'chiqueyac yocstyin.

### **ARTICULO 8**

Tupuj codaca' nutsjitudyes fertyi'ya' yu'tactyi' in mo' yu'tacdye' cui'si' tsun jam' aräjje' juiya' in.  
Räj mun'tyi' tsun tupuj' bijoja' vaj cäts jam' tyi ferche' jedye' chutyisin.

### **ARTICULO 9**

Jam' jun' tupuj va'quiquin in cui'si'yat yä'yedye' mi.

Jam' jui'ya' anic me' juchaij mi. Jamtyi tupuj' yirity mun'tyi' väñädyeya' ji'metyeja ji'cärtyeja.

### **ARTICULO 10**

Räj muntyi in tupuj' chicac in peyaqui juiya' in me' juiya' juchaityi jemoñe' vajmu' yadye'can jicutsac mo' juchadye' mu'.

## ARTICULO 11

Räj mun'tyi cäj jäm'taquity juijya', me naitac juijya' tupuj jime'tac, pajqui jicätsac mo' juchadye' mu', yu' tactyiya' in judyeya' yocstyiya' muntyi in.

Jam jun tupuj ji'metac ferche' jam' ruijsis juchadye' juijya' mu', me' juijya' anic juchaij yirity mun'tyi' jam ra' anic yiristum fersi' somac va'tacdye'.

## ARTICULO 12

Jam jun'tupuj ferche' chuja' jam' tsunsi'juijya', pen mu'in, aca' mu in, jedye' chuc yocsi' mo'ya' mu' in.

Jam ra' ferdye' tum me'jeja' jedye' mi jam ra'chime peyacseja' yocstyi muni'tyi' in.

Räj mun'tyi' tupuj ñutsjiti yu'tacdye' ya' me juijya' jam äräjepte jedye' in.

## ARTICULO 13

Räj mun'tyi tsun mo'ya tupujdye' tsun paj qui shupqueja vatyquej sobaca' juna' chuc ma'je' jijcaja' vatyquej dyim tyeja' juna' chuc ra' bä'ja tsun, pajtsan yocsive bäyedye tupuj sobaca' judyeja cañibuj sha' chimuya' yoya dyem yacchutica'ya' jiquej u.

## ARTICULO 14

Chime vatyquej mu'ya' mun'tyi a'chistum dyijyedye' cächä'chun jemoñe cavin tum quevja' juna' buty tupuj yajquija vaty que yocve bája', chime vatyquej yocsive bäyedye' jijcaja, me'quinam anic juchai mi vaj me'dye ram tapye joi mi.

## ARTICULO 15

Räj mun'tyi tsun tupuj bája' cui'siche' bäyedye judyeya yocve jam' ra' tyi ñutsjisín' in juna' chuc ma'j e'ja' juijya'.

## ARTICULO 16

Mu in son in judyeya'pen in jun'qui' chuc puri nanasti' in tupuj vämi' in judyeya jäm'taqui' aca' in, paj qui parej bá'yí' in, räj ava'tum in, chimedye jemenoñe', vajmei ma'jtidyei' in, chime mo'ya' tupujdye' parejtides mo'in, yacchucdye mo'in.

Aty juijya' muñebu'ban in, tupuj vämeban in, son judyeya' pen in.

Mu' son pen mu' ava' mu' yiris bäyedye shupqui' anic jäm'si'.

## ARTICULO 17

Räj mun'tyi' tsun tupuj mo'ya' cui'si' bäyedye' tsun parej.

Jam' tyi tupuj jisin jam'ra' mu'ya' bá'yim.

## ARTICULO 18

Räj mun'tyi' tsun mo'ya' dyijyedye' tsun ju'ñis chuc ra' jen' nacdye' cächä'chuja' tupuj tsun dyimtjeja' jen'nacdye' ju'ñischuc tsun ma'jeja' anicjeja.

## ARTICULO 19

Räj mo'ya' tupujdye' tsun faraj momo' tsun, räj mun'tyi' tsun, tupuj yu'taca' dyijyedye' peyaca' jam tupuj ñutsjis in peyaca' juijya' jedye' chuc tsunsi' dyijyedye', pajqui yocetyl' chime' se'visin in, jun' chuc dyijyedye' son' si' judyeya' pensi'.

## ARTICULO 20

Räj mun'tyi' tsun mo'ya' tupujdye tsun faraj momo', pajqui jäm' taca' vajmu'yadye', judyeya' yiri'ya'yeja' carijtaca'

## ARTICULO 21

Räj mun'tyi tsun mo'ya' mo' tupujdye' tsun tupuj sisja' yu'tactyi'bu'ja' chime'dye tupuj dyimtyeja yocetyl' paj qui ayo'bu'yi.

Mu'yu' tactyi' ayo'bu'yity jemoñe' räjendyes carijtaqui jun'qui' bu'yi' chuc bäyedye' mu'.

Chime'dye mo' dyim tacdye' ayodyes jemoñe' mu'in mun'tyi' dyimte in tyibuty ra' va'tyeyete in,

## ARTICULO 22

Räj mo'ya tupujdye' tsun, pajqui jäm'bä'ja cui'sum yicdye'tsun carijtacdye' tsun, pajqui damdye jämjoja've.

## ARTICULO 23

Räj mun'tyi' tsun tupuj ju'nis cui'dyimtyeja' carijtacdye' jemoñe' cäts jäm carijtaca'.

Räj mun'tyi' jemoñe' cäts bijoi' carijtacdye'ya'.

Räj mun'tyi' carijtaquia' jemoñe' mo'ya' bijodye' cätssis mu', tupuj qui jedye' ya'ij pendyes mu', ava'dyes mu'.

Räj mun'tyi' mo'ya' tupujdye' mu'in vajmu'ya'yi yiri'ya' yi carijtaqui'in.

## ARTICULO 24

Räj mun'tyi' tsun tupuj jijutyica', sobaca pendye'tun tsun, jam' tyi' tupuj ñutsjis in.

## ARTICULO 25

Räj mun'tyi' tupuj jemoñe' cäts bijoja' carijtacdye'ya' pajqui tupuj cojcaca' pendye' tsun, a'tsun, pajqui' me' tupuj mo'ya' jibtidyes tsun yaiyeja' qui'si' jämtaca cui'si' aca' judyeya pajqui' ji'piñitutica judyeya' chime' yocsi tupuj jedye' ya'yeja jemonja'si'.

Mo' pen' ava'tumsi' mo'ya' tupujdye pajqui' jäm cojcac, räj mu'in miqui mun'tyi' naity in jenyaty in judyeya' jam' jenyaty in vaj me' tupuj cojcac in yojdyem jenyaty u in.

## ARTICULO 26

Räj mun'tyi' tsun tupuj ji'chäyítica' mo' jichäyítide' jemoñe' fibi'ya' yacchutica'dyen ji'chayítica'.

Mo' ji'chäyidye' oya'yas anic jemonac pajqui ji'chäyiti mu' miquity aty chij juijya' tupuj ji'chäyiti fersican ji'chäyítide'.

Mo' ji'chäyitidye mo'ya' jedye'mo' pajqui meiqejcoi' dyijyedye'tsun, chidye' tsun jam jemoñe faraj jeyac mo' jichäyitidye' paj tsan yoctyidye mun'tyi' tsun paj tsan mo'ya' mo' yocsi jennacdye' tsun, jemoñe' jejcac mo' ji'chäyitidye' junqui chuc shupqueca'anic jäm.

Mu' tata tupuj dyimtye' mo' ji'chäyitidye' ju'ñis chuc ra' ji'chäyiti' ava' mu'.

### **ARTICULO 27**

Räj mun'tyi' tsun tupuj mechuja' cui'si' yicdye' bä'yedyeyas tsun judyeya' jedye' cui' mo'yas jämtacdye' tsun.

Räj mun'tyi' tsun tupuj cui'si' jedye' me'chuca' jedye' chuc jämtaca' si'paj qui jam yoctyi' a'tupsin' in.

### **ARTICULO 28**

Räj mun'tyi' tsun tupuj jäm yu'tica' vajmu'ya'tica', pajqui yoctyi' chäyisin in aräjjisin in.

### **ARTICULO 29**

Räj mun'tyi' tupuj chi'caqui bäyedye mu äräjjeyaqui pajqui chime'. Jäm' joivecui', judye bä'yedye' mu'.

Mo' jichäyitidye tupuj jäm yu'sin' paj qui jäm bäja' paj qui' yoctyi' chime' me' jäm bä'yí' in.

Mo' yu'tacdye' jam ra' jedye' chutyin anic jäm mo' yu'tacdye' paj qui' me' tupuj jäm bäja cäts yirityityij mun'tyi' tsun.

### **ARTICULO 30**

Räj oij jac räj yocsi bäyedye' in mi jam yirity mun'tyi' tupuj ji'motsja' oij yutacdye peyejas quin, jemoñe' ji' chiqueyacseja yoctyi' in.

### **Traductores:**

Sergio Roca

René Hiza.